

# 10 Johr Dame FC Mümliswil

---

Un glaublich, aber wöhr:  
D' Dame vom FCM fiire 10 Johr!  
So es Jubiläum – das mues gfiiret si,  
drum fahre mir hüt mit em Büssli nöime hi.  
E Team-Usflug, das het Style!  
Und glaubet nis, es wird sicher geil!  
Bevor mir starte – no chlei Gschicht,  
e churze FCM-Dame 10-Johres Bricht.

Agfange het aues 2004,  
nachem legendäre Grümpeli-Turnier  
,Mir wei tschutte!' hei zwöi begeistereti Meiteli gseit,  
und so d'Weiiche für öises Dame-Team gleit.

Scho gli druf abe hei mir de trainiert,  
Pässli g'üebt und Trickli probiert.  
Frei, Bürgi, Achermaa,  
i de Afangszyte hei mir mehreri Trainer gha.  
Mit Geduld und Usduur hei si öis instruiert,  
d'Grundlage glehrt und immer wieder motiviert.  
Gradi Pässli – mit Innerischt spiele!  
S'Standbei muess zu dr Mitspüuerin ziele.  
So hei mir s' Fuessbau-ABC mitbecho,  
usser s' Jongliere, das üebe mer immer no. ☺

Nach eme Johr isch dr Zytpunkt cho,  
und mir hei d' Meisterschaft in Agriff gno.  
FC Niederbipp gäge FC Mümliswü  
öises erschte, richtige Spüu!  
E 4:1-Niederlag het's zwar geh,  
doch mir hei Luscht becho, uf no meh.  
Mit em Marius hei mir ändlich e feschte Trainer gha,  
Öis Wiiber trainiere – e muetige Maa!  
Mit Humor und Geduld isch es ihm aber glunge,  
öis öpis z'lehre und öis z'erträge, hunderti vo Stunge.  
Innerischt und Vourischt – zwänzg pro Fuess,  
i jedem Training – dasch es Muess!  
Ufem Bitz isch dr Marius i sim Elemänt,  
är rüeft und gestikuliert – vehemänt!  
,Chömed, chömed!' het me oft chönne ghöre-  
bim Schwätze hei mir öis haut nid gärn lo störe.

Dennoch hei mir Fortschritt gmacht,  
und am Ändi vo dr 2. Saison mitem Pokau id Kamera glacht.

Mir si öuter worde – gli keni Juniorinne me,  
hei ufem gross Platz afo tschutte – oje, oje:

Es Riese-Fäud, es hört nüm uf,  
do fäut öis scho grad no chlei Schnuuf.

Mir hei nis dra gwöhnt, mit der Zyt,  
do wird me zwungenermasse irgendwann fit.

Im Juni 2010 het's s'erschte Highlight geh,  
wär derbi isch gsi, vergisst das nie meh:  
In Allschwil hei mir sensationell reüssiert,  
und drmit dr Ufstieg id' zwöit Liga realisiert!!  
D'Korke hei knallt, mir hei gjolet und gsunge,  
si wie wüud ufem Platz umegsprunge.  
D' Heimfahrt im FC-Bus – e legendäri Sach:  
Trinke, Singe, e Riese-Krach!

Optimistisch si mer is Abentüür ‚2.Liga‘ gstartet,  
doch es het nis en angeri Realität erwartet.  
Es höchers Tempo, starki Gägnerinne,  
Mit der Zyt hei mer nis afo hingersinne.  
Ufem Papier het's brutau usgseh,  
nume säute mou hets Pünkt für öis geh.  
Doch wemer zruug luege chöi mer säge,  
die Saison het öis au positiv chönne präge.  
Im FC-Bus si mir jewius wit greist,  
hei ufem Platz zäme kämpft – das het zäme gschweisst.

Dr Marius het gmeint: ‚D' Luft isch duss.  
Sorry Fraue, für mi isch jetze Schluss.‘  
Dankbar für sini tolli Arbeit hei mir ihn lo go,  
und d' Suechi nach eme Nachfouer in Agriff gno.  
Öper geeignets z'finge isch jedoch rächt schwer,  
doch zum Glück isch är de cho: dr Pierre!  
Top-vorbereitet und motiviert,  
eine, wo vüu i sis Hobby investiert.  
Und au die wichtigste Kriterie vorwiise cha:  
Geduld und ganz vüu Nachsicht z'ha!  
E Lachafau oder e wichtigi Usgangs-Story,  
begeistere öis zum Teil meh, sorry.  
Zum Glück lacht dr Pierre de eifach mit,  
en angeri Möglichkeit gäb's jo sowieso nit.

Fuessbauerisch ischs idr 3. Liga de wieder besser gloffe,  
mir hei s'Goal zum Glück öfters troffe.  
Es nöis Ziu hei mer de in Angriff gno:  
Mir wei ändlich mou i Cup-Finau cho!  
Das hei mer gschafft – e super Trip:  
s'Finale spiele mir gäge Niederbipp.  
Dr Car het öis uf Fulebach gfahre,  
mir si nis vorcho wie ächti Fuessbau-Stare!

Motiviert und 100 Prozänt si aui dra,  
hei aber leider gar nüt z lache gha.  
Mir hei de dänkt ,mache mer drus s'Bescht'-  
und fiire ordentlich am Stüblifescht!'

Und sithär hei mir wieder x Tränings bsuecht,  
Mätsch tschuttet und vereinzelt mou gfluecht,  
wenn e Pass nid acho isch, odr d'Stürmer nid hei troffe,  
und mir vergäbe wiiti Streckine si gloffe.

Doch, Schluss-em-Änd cha me säge:  
Us Team chöi mir aues erträge!  
Zäme hei mir schwierigi Phase duregstange,  
-sogar z' nüünte e Match agfange-  
und doch heimer's immer gschafft,  
öis zämegrise und nis ufgrafft,  
zum wieder Erfouge hei z'bringe-  
und mit eme Smirnoff i dr Garderobe z'singe!

Öises Gheimrezäpt, des Erfolges Tür:  
Mitnang und fürenang, dasch öises Füür!  
Drum stosse mir hüt a,  
uf die 10 super Johr, wo mir hei gha.  
S'Motto heisst uf jede Fau:  
Witer so, tschutti-Fraue usem Guldetau!

Und zum Schluss vo dere Show:  
Mir si eis **Team**, Ready-go!

*Caroline Bürgi*